

տրւում է 60 ընդհանուր տեղութեամբ դասեր, երբեմն էլ աւելի քիչ: Գիւղացիութեան մեծամասնութիւնը անգրագէտ է:

Դպրոցի մօտ, դէպի հարաւ գտնւում է գերեզմանատունը, որը ծածկւած է մեծադիր, քառակուսի քարերով: Այստեղ կայ մինչև 311 տարւան գրւած տապանաքար: Գիւղն ունի նաև մի բաղնիք և վեց ջրաղաց:

Նամակերտն իր բնական ամուր դիրքի և բնակիչների քաջութեան պատճառով յաճախ կարողացել է յաջողութեամբ դիմագրել գիւղի վրայ արշաւող աւազակախմբերին և նոյնիսկ կանոնաւոր զօրախմբերի. ափսոս որ ներքին անմիաբանութիւնն ու երկպառակութիւնը նրանց ոյժերն երբեմն ջլատում է:

Նայած գիւղի ընտանիքների ունեցած կարողութեան և աշխատանքի բոլոր ճիւղերից ստացած տարեկան եկամուտի չափին՝ կարելի է բաժանել բնակչութիւնը հետևեալ կարգերի:

| № | Կ Ա Ր Գ Ե Ր       | Շունչ |
|---|-------------------|-------|
| 1 | Աղքատ . . . . .   | 500   |
| 2 | Չունևոր . . . . . | 65    |
| 3 | Միջակ . . . . .   | 900   |
| 4 | Ունևոր . . . . .  | 400   |
| 5 | Հարուստ . . . . . | 100   |
|   | Ընդամենը          | 1965  |

### Ղ Ա Ռ Ղ Ո Ւ Ն

Նամակերտից դէպի հարաւ-արևելք, մօտաւորապէս երեք քառորդ ֆարսախի վրայ, մի ծառազարդ հովտում փռւած է Ղառղունը. սա նոյնպէս զուտ հայաբնակ է և համարւում է շատ հին գիւղ, ինչպէս Նամակերտը: Գիւղն իր բնական դիրքով ներկայացնում է մի գեղեցիկ պատկեր. գեղեցիկ են մանաւանդ նրան շրջապատող ծովանման արտերն ու սիրուն մարգագետինները: Գիւղի միջից հոսում են

\* Տես «Երագիր» Սիմէօն Զաւարեանի: